



e-bilten

OPĆINA TEŠANJ

www.opcina-tesanj.ba

e-mail: fuad.sisic@opcina-tesanj.ba

JUBILARNI – 50-ti BROJ!

Ponedjeljak
Broj 50

21.02.2011

1. Kolegij OV o „Musali”
2. Usvojen izvještaj o radu Općinskog načelnika
3. Prvi susret sa novim Premijerom
4. JELAH: u pripremi novo rješenje za centar Jelaha
5. Stipendije svima

Ukoliko želite da se prijavite za primanje ovog biltena možete to učiniti tako što ćete poslati e-mail na sljedeću adresu: fuad.sisic@opcina-tesanj.ba

Molimo vas da ovaj elektronski bilten prosljedite svim zainteresiranim u našoj općini.

Ukoliko želite da objavite neke od vaših novosti, iskoristite elektronski bilten općinskog načelnika, koji je brz, efikasan i besplatan način komuniciranja sa javnošću.

Sa zadovoljstvom očekujem vaše komentare, sugestije i primjedbe.

Molim da ne prinatate ovaj sadržaj. Za svaki nepotrebno odštampan papir mora se bez potrebe oboriti drvo koje raste!

Općinsko vijeće o “Musali”

Izdata odobrenja u skladu sa regulacionim planom!

Općinsko vijeće Tešanj je na svojoj 25-toj sjednici, održanoj 31.01.2011. godine, na prijedlog Kolegija Općinskog vijeća koje je napravilo uvid u dokumentaciju po kojoj su izdate uranistička i građevinska dozvola za kompleks “Musala” firme Farex,d.o.o. donijelo sljedeće zaključke:

1. **Da su sva dokumenta koje je donijela Služba za katastar, urbanizam i imovinsko-pravne poslove, vezano za gradnju IV sprata na stambeno-poslovnom objektu „Musala“, u skladu sa usvojenim Regulacionim planom „Musala“.**
2. **Općina Tešanj neće mijenjati Ugovor broj: 389/09 od 09.07.2009. godine između Općine Tešanj i „Farex“ d.o.o. Tešanj jer se odobrenjima za gradnju nije izmjenila suština ugovornog odnosa, niti narušio ranije donesen regulacioni plan „Musala“.**

Da je još uvijek aktualna stara izreka koja kazuje o onome što se ne može objasniti racionalno, može politički, govori u prilog činjenica da je Kolegij Vijeća u punom kapacitetu se uvjerio i dokumente i činjenice, i u punom kapacitetu predložio zaključak Vijeću, ali u Vijeću sada neki članovi Kolegija ostaju suzdržani. Da se ne radi o krajnje važnom i ozbiljnom poslu kao i dostojanstvu ljudi, bilo bi smješno. Ovako ostaje svjedočenje javne manifestacije nedosljednosti, politikanstva i konačno – lošeg karaktera, jer ne znam kako bi se to moglo drugačije imenovati.

Usvojen izvještaj o radu Općinskog načelnika za 2010. godinu

Jes' da mi se sviđaš, ali jesi brate i politički protivnik

Općinsko vijeće Tešanj je na prvoj ovogodišnjoj sjednici razmatralo i izvještaj o radu Općinskog načelnika za 2010. godinu. Općinski načelnik je dostavio izvještaj o radu na 14 stranica, pokušavajući da to ne bude zbir izvještaja nadležnih općinskih službi što većina općinskih načelnika danas radi, nego da riječnikom bliskim upravljačkoj poziciji Vijeća i lakšem razumijevanju samih vijećnika, istakne posebno važne oblasti i prioritete, ključne aktivnosti i fokusira prioritete za 2011. godinu i dalje.

Statut Općine Tešanj u pogledu podnošenja izvještaja o radu općinskog načelnika govori sljedeće:



„Općinsko vijeće izvještaj Općinskog načelnika može usvojiti, zatražiti dopunu ili odbiti.

Ako Općinsko vijeće izvještaj odbije, obavezno je ukazati Općinskom načelniku na aktivnosti i mjere koje je dužan poduzeti, predložiti način provođenja tih mjera ili aktivnosti i odrediti rok za izvršenje“.

Sada kada se uzmu u obzir diskusije vijećnika, onda vidim da bi veoma mala razlika bila u onome što je kritički izneseno i da je izvještaj bio samo na jednoj stranici. Čini mi se da bih osim onoga što sam čuo, mogao dobiti još kritiku kako bi jedan takav izvještaj na jednoj stranici bio neozbiljan i znak neuvažavanja Općinskog vijeća. I tako kazano, u jednoj takvoj situaciji, to bi zaista i imalo smisla.

Ovako su ostale kritike radi stranačkih interesa, niko od onih koji nisu podržali izvještaj nije predložio mjere, način provođenja i rok onoga što bi Općinski načelnik trebao uraditi. Niko od njih nije ispunio statutarnu obavezu.

Ali šta kazati o onima koji nikome nisu nizašto odgovorni? Građani nemaju priliku se izjasniti o njihovom (ne)radu, moraju čekati četiri godine a i tada, mogu samo kazniti partiju u ime koje su izabrani dužnosnici vršili mandat. Ali ni to se ne događa, ili se veoma teško artikuliše. Jer globalni ambijent, sistemski problemi i neriješena pitanja koja se ne tiču lokalnog rada uglavnom prevagnu. Medijski prostor je podijeljen prema globalnim državnim, nacionalnim i stranačkim simpatijama a ne prema lokalnim naporima. Stoga oni koji polože zakletvu, a svi izabrani vijećnici su položili zakletve kao i općinski načelnik, pa nakon toga iza javne govornice demonstriraju nepoštivanje položene zakletve je dovoljan razlog da im se oduzme mandat. Ali naša demokratija je mlada, naš izborni zakon nije još predvidio sankcije ali vjerujem i nadam se da hoće. Ne zbog onih koji su sada u mandatu, jer oni su svoje pokazali, nego da ovo iskustvo bude ugrađeno u zakon kao korist za zajednicu za one koji će na narednim lokalnim izborima dobiti mandate. To bi bilo korisno, jer ako ne možemo brzo mijenjati stvari, ne smijemo propustiti priliku da to činimo na duže staze. Pri tome, irelevantno je iz koje političke stranke će doći općinski načelnik, kao što je irelevantno koja ili koje političke stranke će imati ili neće imati većinu u općinskom vijeću. Izvještaj o radu općinskog načelnika je sjajna prilika da se otvori rasprava o smjeru kretanja općinske uprave, o raspravi u vezi sa prioritetima i raspodjeli resursa, o zadovoljstvu građana u vezi sa prethodnim. Istina, jedan vijećnik je odlično primjetio da bi u izvještaju trebala stajati i ocjena zadovoljstva korisnika usluga općinske administracije, ali to je bilo sve. Za sada se te prilike propuštaju, jer se rasprave svode na moguću refleksiju rada Općinskog načelnika na izborni rezultat. Vijećnici SDP-a su redom izlazili za govornicu, od prvog do posljednjeg, sa „kamenicama u rukama“ kojima su iste „bacali u noge“ Općinskom načelniku (ako mogu na ovako slikovit način opišem moj osjećaj). Pri tome, nemam ništa protiv što su djelovali po izdatim direktivama partijske ćelije, ali su to kamenje trebali bacati negdje ispred svih nas i pokazati nam put kojim bismo trebali ići ako ovaj kojim idemo nije dovoljno dobar. Ali nema takvog pristupa, čak se partijskim direktivama priključio i sam Predsjedavajući, diskutujući kako treba razdvajati lokalnu vlast a ne graditi jedinstvo djelovanja. Na kraju je i prekinuo završno obraćanje Općinskog načelnika po iznesenim diskusijama, i poslao završnu poruku šta njegova partija misli o odnosu prema institucijama.

Zaista je jako malo onih koji u tom smislu daju doprinos i imaju ispravan stav, a mnogo više onih koji, ili **ne znaju šta rade pa rade šta znaju**, ili im je očekivana stranačka podrška građana iznad interesa samih građana. Ne tvrdim da sam ja taj koji određuje šta je ispravno, a šta nije, ne daj Bože. Ali kada čovjek radi neki posao onda treba spoznati učenjem iz različitih izvora i praksi okvir djelovanja: pravni, proceduralni, logički i politički. Nisam slučajno ostavio na posljednjem mjestu politički jer se prethodno nabrojano mora poštovati. Pravni i proceduralni okvir se može uvijek mijenjati, ali ne jednokratnim političkim stavovima nego na način na koji je taj okvir prethodno donesen.





Prvi susret s novim Premijerom Vlade ZDK

Imamo li sreće s premijerima?



Miralem Galijašević je uspješno obnašao dužnost Premijera Vlade ZDK duže od jednog mandata. Prije njega je smjenjen Nedžad Polić zbog sukoba interesa, koji je hrabro i snažno trasirao novi put kojim je krenula Vlada ZDK. Neki su mu prigovarali (priznajem, i ja sam jedan od tih) da treba taj posao raditi sa više osjećaja, ali bio je to hrabro menadžersko vodstvo za jasnim ciljem bez zadržavanja i velikih konsultacija oko najboljih odluka. Miralem Galijašević je nastavio zacrtanom trasom sa mnogo više osjećaja i saradnje, ali bez inoviranja postavljenih ciljeva. Istina, stigla je recesija u drugoj polovini mandata, tako da je focus bio više ka tome da brod privede mirno u luku nego da započne novo putovanje. Ipak, dobio je snažnu - najveću podršku birača na nivou ze-do kantona. Ostao je u timu – Predsjedavajući Skupštine ZDK.

Mandatar Vlade Fikret Plevljak, prvi telefonski kontakt i upoznavanje. Iznenadio sam se veoma pozitivno prijateljskim tonom razgovora budućeg Premijera. A zbog čega sam se iznenadio? Iz prostog razloga jer moje iskustvo sa prethodnim dužnosnicima na državnim pozicijama iz SDP-a nije bilo takvo. Za one sa kojima sam imao priliku na bilo koji način surađivati, bilo je očigledno, čak su to rado isticali da im je Partija iznad institucija, ono što je zadatak Partije, što je stav Partije, učiniće sve da provedu bez obzira na propise, nadležnosti. To su uglavnom činili bahato. Iz tog razloga je ovo za mene bilo pravo osvježenje. Istina, i prvi javni nastup g-dina Plevljaka nakon što su SDP-SDA-Radom za boljitak-HSP dogovorili podjelu prvih pozicija u ZDK bio je državnički, a ne partijski.

I prvi radni sastanak 17.02.2011. godine koji je trajao sat vremena potvrdio je moj prvi utisak. Nije bilo nijedno pitanje u kome sam ja kao općinski načelnik i g-din Plevljak kao budući premijer imali različita stajališta i mišljenja. Izgradnja institucija, institucionalno djelovanje, poboljšanja gdje god su moguća, posvećenost pitanjima od interesa građana a ne vraćanja unazad i beskorisne političke rasprave. Različite stranačke pripadnosti nisu i ne trebaju biti bilo kakva prepreka uspješnoj saradnji. Neka je sretno g-dinu Plevljaku!



JELAH – u pripremi novo rješenje za centar Jelaha

Prilika za JPP u Jelahu



Općina Tešanj je u saradnji sa projektnom kućom iz Sarajeva uradila novo početno rješenje za sam centar Jelaha: sadašnji proctor Doma za kulturu, Zemljoradničke zadruge i Veterinarske stanice. Ponuđena su četiri varijantna rješenja koja bi obuhvatila proctor za administrativne, kuturne, rekreativne i komercijalne sadržaje sa adekvatnim parking prostorom. Organi uprave Općine Tešanj su dogovorili da prije dostavljanja Općinskom vijeću na izjašnjenje o usvajanju nacрта ove odluke, da svoje mišljenje prethodno iznese i Skupština MZ Jelaha. Ovo je prilika za novi početak zajedničkog djelovanja lokalne općinske vlasti i mjesne uprave Jelaha.




STIPENDIJE SVIMA

Studentima osigurana podrška

Omladinski sektor na području općine Tešanj se uspješno razvija a politika prema mladima je, nesumnjivo i sa jasnim pokazateljima, u uzlaznoj putanji. Općina Tešanj nastavlja podršku studentima, od 2004. godine do danas ona je u stalnom usponu. STIPENDIJE SVIMA je projekat koji se pokazao kao primjer dobre prakse. Podsjećam da smo 2003/2004 školske godine imali 33 stipendije, a danas dodijeljujemo 326 stipendija. To je deset puta više, a naš budžet je u istom periodu tek dva puta veći. Protekle godine je Općina Tešanj od strane nevladine organizacije CCI u pogledu provođenja omladinske politike ocjenjena kao druga u Bosni i Hercegovini. Naš je cilj biti prvi, ne zbog tih ocjena nego zbog vas. Općina Tešanj je razvila široku podršku mladim, postoje transparentni i fer mehanizmi, sada nam treba više izvora finansiranja jer je lokalni budžet postao nedovoljan. Protekle godine nam je pomogla Vlada ZDK, nadamo se i ovogodišnjoj pomoći, a gradimo intenzivno partnerstva sa drugima kako bi NVO sa područja općine Tešanj imao više šanse za pristup izvorima različitih domaćih i stranih fondova. Ove godine će Općina Tešanj izaći sa još jednim novim mehanizmom podrške: podrška otvaranju novog biznisa za mlade ljude. Mladi ljudi moraju razmišljati poduzetno, moraju biti poslodavci, razvijati sopstvene biznise. Razmatramo mogućnosti u vezi sa obezbjeđenjem pripravničkog staža nakon studija, jer sada je to postao ozbiljan problem.

Broj stipendija



Jer kako kaže Johan Volfgang fon Gete:

Nikad ne smije čovjek, niti narod, misliti da je došao kraj. Gubitak posjeda lahko nadoknadimo. Za druge gubitke nas utješi vrijeme. Samo jedno zlo je neizlječivo – ako narod sam digne ruke od sebe.



PRED ČATIĆEVIM MEZAROM

***Isti je nišan nad nama
samo je tvoj bolji
svijet***

Amir Brka

Općinski načelnik
Fuad Šišić

